



Акафист

Честному и Животворящему Кресту Господню

Кондак 1

В бранех победный, в дни мира спасительный,
Кресте честный, христианское знамение,
Тя величаем, Тебе поклоняемся
И восписуем хвалы благодарственные.
Ты же одеян Небесною силою,
Нас сохрани, да зовем Тебе радостно:
Радуйся, Живоносный Кресте,
Благочестия Непобедимая Победа!

Икос 1

Крест всечестный окружают незримо днесь
умозрители Ангели в страхе,
И благодать светоносную видяще явно,
Ныне обильно даемую верным,
Благоговейно стояще зовут таковая:
Радуйся, Кресте Ты знамя победное;
Радуйся, чудо умом неисследное.
Радуйся, Ангельским взором Твой свет
удивление;
Радуйся, демонским зраком Твой вид уязвление.

Радуйся, радость премирных обителей;
Радуйся, горсть подземных мучителей.
Радуйся, Небом явленное миру видение;
Радуйся, горняго света над миром горение.
Радуйся, лествица к Небу возведшая;
Радуйся, облако к свету приведшее.
Радуйся, Божие в дольний мир ты снизхождение;
Радуйся, смертнаго в горний рай ты
восхождение.
Радуйся, Живоносный Кресте, благочестия
Непобедимая Победа!

Кондак 2

Распятый на Древе Христос Вседержитель,
Древо проклятия Древом спасения дивно являет
И обладает Божественной Силой многою,
Крест искупления, знамя победы,
Страшное злым, благодатное верным,
Иже Крестом осеняеми Богу поют: Аллилуиа!

Икос 2

Емлются верою силы Христовы,
Царь Константин в поле браннем моляся,
Видев же образ Креста в час полудне,
Изображенный на небе звездами
И надписание дивное: "СИМ ПОБЕЖДАЙ",
Весь вдохновенный к нему вопиет таковая:
Радуйся, Кресте звездами сияющий;

Радуйся, сильный, врага побеждающий.
Радуйся, щит и броня в битве воинству
бранному;

Радуйся, град и стена в мире братству
избранному.

Радуйся, Кресте, Ты миру хранение;
Радуйся, мирный, вражды разрушение.

Радуйся, огненный меч, силу тьмы посекающий;
Радуйся, пламенный серп, ниву зла
пожинающий.

Радуйся, стран и народов хранение;
Радуйся, сел и градов ограждение.

Радуйся, очи мои просвещающий верою;
Радуйся, сердце мое озаривый надеждою.

Радуйся, Живоносный Кресте, благочестия
Непобедимая Победа!

Кондак 3

Силу Креста разумевше, царица Елена
Сына желание тщится исполнити скоро:
Крестное Древо под прахом земли обрести
И явити пред миром источник Святыни.
Тем же к Распятому сердце и ум возводящи,
Тепле молитвенный глас вопиет: Аллилуиа!

Икос 3

Треблаженное древо Креста созерцати желая,
Повелевает царица Елена служащим:

"Крест Жизнодавца ищите усердно,
В недрах земли утаенный издревле",
Сама же стоящи взывает таковая:
Радуйся, Кресте, начало спасения;
Радуйся, светлый, заря искупления.
Радуйся, дланей Христовых благое простертие;
Радуйся, в смерти явивый и жизнь, и
бессмертие.

Радуйся, выси Небес разверзающий;
Радуйся, в бездне врага сокрушающий.
Радуйся, ног Жизнодавца Святое подножие;
Радуйся, людям открывый смотрение Божие.
Радуйся, миру Ты камень сумнения;
Радуйся, Церкви Ты слово спасения.
Радуйся, Ты погибающих паки взыскуеши;
Радуйся, Ты обольщаемым путь указуеши.
Радуйся, Живоносный Кресте, благочестия
Непобедимая Победа!

Кондак 4

Ужас объемлет людей ожидавших,
Егда от земли изнесено бысть Древо Честное
И в той же час сила Креста показася предивно –
Мертвец бо воскрес Крестом осененный
И видевши страшное чудо
Возопиша Богу хвалебную песнь: Аллилуиа!

Икос 4

Трепетно радуется перед народом святая Елена
В день, егда дивно обретается Древо Честное
И востече возвестити царю превеликую радость.

Сей же царю-псалмопевцу подобися, духом
торжествоваше,

Ликуя пред Богом, хвалы воздвизая Кресту
таковая:

Радуйся, Кресте земли осенение;

Радуйся, чудный Небес украшение.

Радуйся, в море далече Ты пристань хвалимая;

Радуйся, в безднех воздушных Ты сила
незримая.

Радуйся, стрелы во дни отвращающий;

Радуйся, страхи в ночи отгоняющий.

Радуйся, воздух и воды Крестом освящаются;

Радуйся, буря и пламень Крестом укрощаются.

Радуйся, в бурю пловцам Ты спасение;

Радуйся, в скорби Ты всем утешение.

Радуйся, сущим в пути Ты звезда путеводная;

Радуйся, сущим в морях Ты стезя мореходная.

Радуйся, Живоносный Кресте, благочестия
Непобедимая Победа!

Кондак 5

Видети Крест Живодавца желающе,

Людие вси умолиша Святителя,

Да подъемля высоко, покажет народу

Блаженное Древо,
Взем же Святитель своими руками, Крест
воздвизает,
И вси велегласно Богу молитвенным гласом
поют:
"ГОСПОДИ ПОМИЛУЙ"
И припевают Священную песнь: Аллилуиа!

Икос 5

Огнезрачен в міре Крест воздвизаем явися
И освящаеми Им, вернии вси веселятся,
Зряще Его яко Виновника Благ,
Тем же Ему поклоняемся ныне
И вопием похвалы таковая:
Радуйся, Кресте рай вечныя сладости;
Радуйся, дивный дар Божия благости.
Радуйся, Ты воздвизаемый нас воздвизаеши;
Радуйся, Ты поклоняемый нас освящаеши.
Радуйся, вышняго града взыскание;
Радуйся, вечныя правды сказание.
Радуйся, Ты в дни скорбей нам отрада любимая;
Радуйся, Ты в годы бед нам стена нерушимая.
Радуйся, к Богу ты мір привлекаеши;
Радуйся, стадо Христу собираеши.
Радуйся, веры лампада Тобою светлеется;
Радуйся, пламень молитвы тобою возвеется.
Радуйся, Живоносный Кресте, благочестия
Непобедимая Победа!

Кондак 6

Единодушно под кровом Креста да пребудем,
Его же держаще, яко же воин оружие брани,
Сим победим врагов веры нашествия,
И лобызающе Древо Честное, священное,
Богу немолчную песнь вопием: Аллилуиа!

Икос 6

Мощь разрушив нерушимую ада,
Светом Своим озаряет Христос
Сущих в юдоли плачевней и мрачной,
И нетерпяще Небеснаго света,
Адовы силы падоша с диаволом вкупе,
Вси же спасения видевши Крест
Изыдоша в радости, славу поюще преславному
Древу:

Радуйся, Кресте, оружие дивное;
Радуйся, знамя диаволу страшное.
Радуйся, Ты еси адовых уз расторжение;
Радуйся, Ты еси смертных оков низвержение.
Радуйся, входы рая отверзающий;
Радуйся, смерти врата сокрушающий.
Радуйся, страсти Христовы в сердцах
обновляющий;
Радуйся, всем воскресения славу являющий.
Радуйся, Божие в мир снизхождение;
Радуйся, с Богом людей примирение.
Радуйся, Ты безотрадных отрада желанная;

Радуйся, Ты безнадежных надежда единая.
Радуйся, Живоносный Кресте, благочестия
Непобедимая Победа!

Кондак 7

Умудренному Богом вождю Моисею,
Хотящу народ свой изъяти от горькия муки,
Жезл путеводный во образ Креста подается.
Ведый же силу Креста издалеча,
В страхе пророк вопияше хвалу: Аллилуиа!

Икос 7

Плоть восприявшее Отчее Слово,
Грех человека на рамо подъемлет,
И на Кресте умирает Сын Божий,
Грех наш и клятву и смерть пригвождает,
Да вопием Ему тепле, Креста восхваляюще силу:
Радуйся, Кресте, Ты падших восстание;
Радуйся, Крепкий, Ты грешных воззвание.
Радуйся, прелесть и грех на Тебе пригвождается;
Радуйся, плоть со страстьми на Тебе
распинается.
Радуйся, Ты еси образ смирения;
Радуйся, Ты еси иго терпения.
Радуйся, Ты нам Христову любовь знаменуеши;
Радуйся, Ты совершенство в любви указуеши.
Радуйся, наших печалей отгнание;
Радуйся, наших скорбей врачевание.

Радуйся, в час наказания нас укрепляющий;
Радуйся, в день испытания нам помогающий.
Радуйся, Живоносный Кресте, благочестия
Непобедимая Победа!

Кондак 8

Образ смирения Спасова видевши,
Иго благое Его восприимем:
Мира отвергшесе к Небу воспрянем,
Ибо Безгрешный распялся на Древе,
Да нас к высоте привлечет, вопиющих к Нему:
Аллилуиа!

Икос 8

Крест милосердие Божие к людям являет,
Божий бо Сын воплотился от Девы,
В рабии образе с нами живет
И подъемлет наш грех нестерпимый
И страждет Безгрешный до смерти,
Нас оживляя Крестом благодатным.
Ему же ныне поем таковая:
Радуйся, Кресте, Ты честь милосердия;
Радуйся, Грозный, Ты суд жестосердия.
Радуйся, нищии духом Тобою взыскуются;
Радуйся, кротции сердцем Тобою красуются.
Радуйся, милость Тобою является;
Радуйся, правда Тобою свершается.
Радуйся, Ты умирати за ближняго учиши;

Радуйся, Ты возлюби́ти врага наставляеши.
Радуйся, Крест и любовь нам хваление;
Радуйся, месть и вражда нам стыдение.
Радуйся, Ты на земли в путь прискорбный нас
водиши;
Радуйся, многую мзду в Небесах нам готовиши.
Радуйся, Живоносный Кресте, благочестия
Непобедимая Победа!

Кондак 9

Любвеобильно пришел к человеку
Спас и Избавитель мiра Христос,
Руце Свои простирает на древе,
Всю собирая вселенную вкупе,
К горним чинам приводя естество человека,
Богу поюще вечную песнь: Аллилуиа!

Икос 9

Адовы силы не могут прияти тайну Креста
Твоего, Жизнодавче,
Како Распятый и смерть претерпевый,
Смертию смерть разрушаеши сильнее,
Мы же поем Воскресения Славу
И Креста Твоего благодать и державу зовуще:
Радуйся, Кресте, Ты мудрость примерная;
Радуйся, Чудный, Ты святость безмерная.
Радуйся, Бог бо воскресе, к Тебе
пригвоздивыйся;

Радуйся, мир бо спасеся, Тебе покоривыйся.
Радуйся, Кресте, Ты солнце вселенныя;
Радуйся, слава и честь вожделенная.
Радуйся, Ты под криле свое мир собираеши;
Радуйся, Ты бо главою Небес досязаеши.
Радуйся, Кресте, ты сильных падение;
Радуйся, Крепкий, смиренных восстание.
Радуйся, Ты тишину нам Христову являеши;
Радуйся, нашу вину Ты на век упраздняеши.
Радуйся, Живоносный Кресте, благочестия
Непобедимая Победа!

Кондак 10

Наше растленное все естество обновляя,
Единородный Сын Божий – Сын Девы бывает
И страждет на Древе нас ради Безстрастный
И смерть восприимлет, да нас оживит,
Светло поющих Воскресшему песнь: Аллилуиа!

Икос 10

Яко державный покров и основу вселенныя
зрим Тя,
О Кресте Христов Живоносный,
Ибо Создатель небес и земли Вседержитель
Руцы Свои на Тебе простирает за грех наш,
Всех научая Тебе воспевати:
Радуйся, Кресте, Ты мира хранение;
Радуйся, Мощный, земли утверждение.

Радуйся, новый бо рай на земли утверждаеши;
Радуйся, в смертной юдоли нам жизнь
водружаеши.

Радуйся, жезле Великого Пастыря;
Радуйся, скиптре Христа Вседержителя.
Радуйся, веры, надежды, любви сочетание;
Радуйся, правды Христовой и мира вещание.

Радуйся, совесть Крестом озаряется;
Радуйся, воля Крестом управляется.
Радуйся, чуждым Ты мудрость во век
необъемлемая;

Радуйся, верным Ты радость во век
неотъемлемая.

Радуйся, Живоносный Кресте, благочестия
Непобедимая Победа!

Кондак 11

Единодушно Тя славяще песньми святыми,
Кресте Христов, миру радость и слава,
Како возможем достойно воспети
Бездну даров и чудес Твоих тайну.
Тем же Тебе поклоняемся присно,
Богу поюще немолчную песнь: Аллилуиа!

Икос 11

Многообразна честнаго Креста благостыня,
Сей бо хранит основание веры,
Сей единение Церкви связует,

Сей освящает исходы и входы,
Тайно вводя нас в Небесное Царство,
Научая о Бозе Ему воспевати:
Радуйся, Кресте, Ты слава церковная;
Радуйся, Крепкий, Ты сила духовная.
Радуйся, всем Ты, Святый, во Христе единение;
Радуйся, всем Ты, Благий, во Христе
обновление.

Радуйся, Кресте, Ты знамя крещения;
Радуйся, Кресте, печать искупления.
Радуйся, сад напоенный пречистою Кровию;
Радуйся, меч изощренный Христовою страстию.
Радуйся, имя врагу нестерпимое;
Радуйся, пламя во век негасимое.

Радуйся, Ты наш обет от купели крещения;
Радуйся, Ты наш залог до зари Воскресения.

Радуйся, Живоносный Кресте, благочестия
Непобедимая Победа!

Кондак 12

Светом сияет нам Крестное Древо,
Светом водящи в юдоли плачевной,
Веру приемлет, надежду внедряет,
В сердце любовь возгревает святую
И научает зывати во дни и в нощи: Аллилуиа!

Икос 12

Яко на светоч в ночи безрассветной,
Дух мой унылый на Тя уповает,
Кресте Христов, Живоносная сила,
Горняго града взыскуя, но вверженный долу,
Очи свои возвожу к высоте Твоей дивной
И преклоняя колена души же и тела,
Бренный и блудный взываю Ти тако:
Радуйся, Кресте, Тебе поклонение;
Радуйся, Чудный, Тебе мое пение.
Радуйся, смертным Ты путь к Небесам
указуеши;
Радуйся, горних с земным Ты союзом связуеши.
Радуйся, иго смиренным любезное;
Радуйся, бремя надменным полезное.
Радуйся, в море скорбей Ты отрада желанная;
Радуйся, в бурю страстей тишина благодатная.
Радуйся, в жизни мое Ты стяжание;
Радуйся, в смерти мое увенчание.
Радуйся, Кресте, храни нас в молитве
взывающих;
Радуйся, Кресте, спаси нас Тебе воспевающих.
Радуйся, Живоносный Кресте, благочестия
Непобедимая Победа!

Кондак 13 (вариант для пения)

О! Многопетое Древо Креста!
О! Многопетое Древо Креста!

К Тебе яко живу взываем смиреннии,
К Тебе проливаем мольбы недостойнии.

О! Живоносное Древо Креста!

О! Живоносное Древо Креста!

Укажи нам грешным путь жизни спасительный
И в страшный час смерти нам буди прибежище.

О! Треблаженное Древо Креста!

О! Треблаженное Древо Креста!

Огради от мрачных и вечных мучений
Да к Царствию Света приидем поюще: Аллилуия!
Да к Царствию Света приидем поюще: Аллилуия!
Да к Царствию Света приидем поюще: Аллилуия!

Кондак 13 (вариант для чтения)

О! Многопетое, О! Живоносное,

О! Треблаженное Древо Креста!

К Тебе яко живу взываем смиреннии,
К Тебе проливаем мольбы недостойнии.

Укажи нам грешным путь жизни спасительный
И в страшный час смерти нам буди прибежище.

Огради от мрачных и вечных мучений

Да к Царствию Света приидем поюще:

Аллилуия! Аллилуия! Аллилуия!



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
ИЗДАНИЕ**